

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ODLUKA

**O PRIHVATANJU ZADUŽENJA PO UGOVORU O ZAJMU IZMEĐU BOSNE I
HERCEGOVINE I EVROPSKE BANKE ZA OBNOVU I RAZVOJ (EBRD) ZA
PROJEKT VODOVOD SARAJEVO**

Sarajevo, septembar 2017. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16) Predstavnički dom Parlamenta Federacije Bosne i Hercegovine na __ sjednici održanoj _____ godine i Dom naroda Parlamenta Federacije Bosne i Hercegovine na __ sjednici održanoj _____ godine d o n o s i

ODLUKU

O PRIHVATANJU ZADUŽENJA PO UGOVORU O ZAJMU IZMEĐU BOSNE I HERCEGOVINE I EVROPSKE BANKE ZA OBNOVU I RAZVOJ (EBRD) ZA PROJEKT VODOVOD SARAJEVO

I.

Prihvata se zaduženje Federacije Bosne i Hercegovine (u daljem tekstu: Federacija BiH) po Ugovoru o zajmu između Evropske banke za obnovu i razvoj (u daljem tekstu: EBRD) i Bosne i Hercegovine (u daljem tekstu: BiH) za Projekt vodovod Sarajevo u iznosu od 25.000.000,00 EUR.

II.

Sredstva kredita iz tačke I. ove Odluke koristit će se za realizaciju Projekta vodovod Sarajevo. Cilj Projekta je rekonstrukcija prioriternih komponenti vodovodnog sistema, kako bi se smanjili gubici vode i poboljšala ukupna efikasnost vodovodnog sistema.

III.

Sredstva zajma iz tačke I. ove Odluke, odobravaju se Federaciji BiH pod sljedećim uslovima:

- iznos zajma:.....25.000.000,00 EUR-a
- rok otplate:.....15 godina
- grace period:.....3 godine
- kamatna stopa:.....šestomjesečni EURIBOR plus marža 1% godišnje
- jednokratna provizija:.....1 % na iznos glavnice zajma
- dospjeća:.....polugodišnje u jednakim otplatama glavnice
- provizija na raspoloživi iznos zajma:.....0,5 % godišnje na nepovučeni iznos zajma

IV.

Potvrđuje se da je razmatrana dokumentacija prihvatljiva za Federaciju BiH, a posebno:

- Ugovor o zajmu između EBRD-a i BiH;
- Nacrt Ugovora o podršci projekta između Kantona Sarajevo i EBRD-a;
- Nacrt Ugovora o implementaciji Projekta između KJKP „Vodovod i kanalizacija d.o.o. Sarajevo i EBRD-a;
- Nacrt Supsidijarnog ugovora između BiH i Federacije BiH.

V.

Sredstva zajma iz tačke I. ove Odluke prenijet će se na Kanton Sarajevo potpisivanjem Podugovora o zajmu između Federacije BiH i Kantona Sarajevo. Kanton Sarajevo će zaključivanjem odgovarajućeg Podugovora o zajmu prenijeti zajam na KJKP „Vodovod i kanalizacija“ d.o.o. Sarajevo, kao krajnjem dužniku i korisniku zajma.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

VI.

Zadužuje se Federalno ministarstvo finansija da s Kantom Sarajevo usaglasi i sklopi odgovarajući Podugovor o zajmu kojim će, u svrhu redovne otplate, definirati uslove vraćanja sredstava koja se prenose na osnovu zajma.

VII.

Daje se saglasnost za zaključivanje Supsidijarnog sporazuma između BiH i Federacije, kao i saglasnost za zaključivanje i usaglašavanje odgovarajućih Podugovora o zajmu između Federacije i Kantona Sarajevo, kojim će se, u svrhu redovne otplate, definirati uslovi vraćanja sredstava koja se prenose po osnovu zajma.

Za potpisivanje Supsidijarnog sporazuma i Podugovora o zajmu, ovlašćuje se federalni ministar finansija.

VIII.

Za realizaciju ove Odluke i izvještavanje zadužuju se Federalno ministarstvo finansija, Kanton Sarajevo i KJKP „Vodovod i kanalizacija“ d.o.o. Sarajevo, svako u okviru svoje nadležnosti.

IX.

Implementacija Sporazuma iz tačke I. ove Odluke ne zahtijeva donošenje novih ili izmjenu postojećih zakona.

X.

Ova Odluka stupa na snagu narednog dana od dana objavljivanja u “Službenim novinama Federacije BiH”.

OBRAZLOŽENJE

I - Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrta kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje.

II - Razlozi za donošenje

Donošenjem ove Odluke stvara se osnov za potpisivanje Supsidijarnog sporazuma između BiH i Federacije BiH, a potom i Podugovora o zajmu između Federacije BiH s Kantonom Sarajevo, na osnovu kojeg će Federacija BiH sredstva zajma proslijediti Kantonu Sarajevo. Kanton Sarajevo će zaključivanjem odgovarajućeg Podugovora o zajmu prenijeti zajam na KJKP „Vodovod i kanalizacija“ d.o.o. Sarajevo, kao krajnjem dužniku i korisniku zajma.

Sredstva zajma koristit će se za realizaciju Projekta vodovod Sarajevo. Cilj Projekta je rekonstrukcija prioritetnih komponenti vodovodnog sistema, kako bi se smanjili gubici vode i poboljšala ukupna efikasnost vodovodnog sistema.

III - Obrazloženje pojedinih tačaka

Tačka I. je nužna kako bi se prihvatilo zaduženje Federacije BiH kod EBRD-a

Tačkom II. potvrđuje se namjena utroška sredstava zajma.

Tačkom III. precizirani su uslovi zajma.

Tačkom IV. potvrđuje se da je dokumentacija parafirana tokom pregovora s EBRD-om prihvatljiva za Federaciju BiH, što je uslov da BiH i EBRD pristupe potpisivanju Ugovora o zajmu.

Tačkom V. se definira način implementacije Projekta, te da nije potrebno osigurati dodatna sredstva u budžetu Federacije BiH za ovu namjenu.

Tačkom VI. se definira obaveza Federalnog ministarstva finansija da s Kantonom Sarajevo usaglasi i sklopi odgovarajući Podugovor o zajmu.

Tačkom VII. daje se saglasnost za zaključivanje Supsidijarnog sporazuma s BiH, Podugovora o zajmu između Federacije BiH sa Kantonom Sarajevo i ovlaštenje federalnom ministru finansija da u ime Federacije BiH potpiše iste.

Tačkom VIII. u okvirima nadležnosti definira se obaveza za realizaciju Odluke i izvještavanje.

Tačkom IX. se potvrđuje da za implementaciju Ugovora o zajmu nije potrebno donijeti nove ili izmijeniti postojeće zakone.

Tačka X. propisuje stupanje na snagu ove Odluke.